

欽定平定教匪紀略

欽定平定教匪紀畧卷四十二

二十年正月十六日

壬寅

上諭內閣曰前年逆案內自京逸出者有祝現等五犯自滑城逸出者有劉成章一犯均係逆首林清李文成同謀糾串渠魁其餘開單飭緝次要犯五十餘名亦係從逆匪徒所以屢經降旨必欲緝拏者將令罪人斯得亟正刑誅以彰國憲其事猶小

實以此等梟獍之徒若稍留餘孽在此時不過匿跡偷生苟延喘息日久查拏漸弛又必煽誘愚民復生萌蘖天下氓庶皆朕赤子欲使長享太平必當淨除餘慝以保善良本年自立春以後瑞雪優霑各省普徧仰見

上蒼垂鑒亦因除莠安良事非獲已是以

天心允協錫福降康凡我臣民皆當同深欽感著通諭

直隸河南山東山西四省督撫提鎮藩臬以及道府州縣佐貳等官大小同心將飭緝最要次要各犯嚴密查緝不可稍有擾累良民現在京城節次所獲餘犯於前年滋事後無不更改姓名混跡覓食所有飭緝各要犯俱曾見有賞格開寫姓名年貌自必更改姓名在同教之家隱秘窩藏總須密訪真確一捕卽獲則地方毫無驚擾而該逆犯等

次第七獲一無漏網從此寰宇永慶救寧將來逆
犯就獲時卽訊明自前年九月以後在境內藏匿
其該管地方官縱失察年餘不惟免其處分仍必
加以陞賞將此剴切曉諭各官吏當共釋疑慮咸
圖自奮勉副朕意

二月初六日壬戌董誥等奏請將聽從助逆情罪

尤重之馬二卽馬文通照律凌遲處死梟首示

衆情罪次重之馬文明業經病故外甘牛子張喜卽張玉隴任三馬文亮曹黑子均擬斬立決知情不首之任四等五犯及應行緣坐之張劉氏等九名口分別發遣流徒監禁得

旨馬二卽馬文通著凌遲處死梟示甘牛子張喜卽張玉隴任三馬文亮曹黑子俱著卽處斬張劉氏聶李氏馬張氏祝星氏俱係緣坐逆屬又學習邪

教情節較重著發往烏魯木齊給兵丁爲奴並著
刑部查明業內歷次發遣各省駐防爲奴緣坐女
犯內有學習邪教者一體改發卽由該處發往餘
依議

二月十五日

辛未

那彥成奏言據委員拏獲已正

法逆犯李世德之子李大旺李二旺二名均年
未及歲訊未預知逆情照例監禁俟成丁時發

遣爲奴奏入報

聞

二月二十九日乙酉那彥成奏言據委員拏獲邊

二卽邊道遠一犯訊明該犯曾僱與已正法逆

犯李世德家內傭工聽從習教經李世德之叔

李老給與布帶畏害接收事後復將李世德之

子李大旺李二旺藏匿應請發新疆給額魯特

爲奴到配加枷號三年奏入得

旨刑部議奏旋經刑部照所擬議覆

上從之

三月二十四日

庚戌

董誥等奏請將聽從助逆情

罪次重之耿雨子祝二卽祝磨兒均擬斬立決

祝二暫行監禁待質情罪尤重之董二在監病

故應照例戮屍梟示應行緣坐之王六及知情

不首之巴老等五犯分別發遣杖流完結得

旨耿雨子著卽處斬董二著戮屍梟示祝二卽祝磨
兒依擬應斬仍著暫行監禁待質餘依議

三月二十五日

辛亥

那彥成奏言據邯鄲縣知縣

尹鴻璐拏獲逆犯趙德卽金玉一名臣親提研

鞠緣趙德先經師六成勸令入教嘉慶十八年

八月間師六成以牛亮臣欲動刀兵之言向告

又送給旗布約定九月十五日起事至九月初
三日師六成因李文成被滑縣收禁囑令於初
七日跟隨劫獄次日聞有官兵前往剿捕趙德
畏懼逃出各處求乞本年二月至邯鄲縣地方
被獲應請擬斬立決奏入得

旨趙德卽金玉著卽處斬

四月二十九日

甲董誥等奏請將監禁待質之

祝二卽磨兒並情罪次重之祝三卽秋兒均斬
立決知情不首之毛二卽毛連登杖流擬結得
旨祝二卽磨兒祝三卽秋兒俱著卽處斬餘依議

七月十七日庚子董誥等奏請將聽從助逆情罪

又次重之郝八卽郝忠擬斬監候秋後處決應
行緣坐之王張氏並知情不首之郝三隱匿逆
屬之張蒼分別遣流杖徒擬結得

旨郝八卽郝忠依擬應斬著監候秋後處決餘依議

七月十八日

辛丑

陳頤奏言據鄒縣知縣周景岩

等拏獲從賊匪犯趙振五一名

臣

親提嚴審緣

趙振五卽趙法魁籍隸定陶素與教匪蕭漢三

認識嘉慶十八年九月初九日經蕭漢三邀約

同不識姓名十餘人偕至張二狗子家會齊隨

赴縣署放火劫獄後見官兵齊集趙振五卽乘

空逃跑赴江南一帶討乞度日甫欲回家探望
卽被拏獲臣於審明後卽恭請

王命將該犯凌遲處死訖奏入報

聞

八月初九日

辛酉

那彥成奏言據長垣縣職員張

桂林等呈控山東荷澤縣匪徒畢臭等搶掠一

案經

臣

咨會山東撫

臣

飭屬關緝畢臭等各犯

提省審辦緣畢臭與已獲之畢大復禮畢大喜
畢大驢畢明畢玉柱畢連畢藏畢大官畢可畢
二柱戶畢二禿畢開驗畢貴畢學文畢三瞎畢
拴住均係山東荷澤縣畢家寨人嘉慶十八年
九月間已正法之教匪朱成貴率衆到村逼令
從逆朱成貴在村挑選八十人派畢臭爲大頭
目並派畢大復禮畢明畢玉柱畢大官畢大鹿

畢復義畢春景畢陶氣八人爲小頭目分路搶糧先後搶掠張家樓等村事主張桂林等家糧食衣服等物朱成貴復與徐安輜會齊同至滑縣適朱成貴之弟朱三聞知山東官兵剿捕其家帶同畢臭等回至胡家集探望家口已被官兵洗淨又逃至安陵集被官兵追趕畢臭等各自逃散至十九年二月內經事主張桂林等控

縣查拏是年七月內畢大復禮畢大喜畢大驢
復聽從畢二長等赴王維範地內搶糧王維範
赴荷澤縣呈控經長垣縣差役拏獲畢大喜之
弟畢二禿畢大喜邀同畢闖等趕往奪回陸續
緝獲畢臭等十七犯除畢大復禮畢三瞻畢拴
住畢學文四犯先後病故外畢臭畢大喜畢大
驢均請擬斬立決梟首解赴各犯事地方示衆

畢明等十犯均請發遣新疆給額魯特爲奴
奏入得

旨刑部速議具奏旋經刑部照所擬議覆得

旨畢臬畢大喜畢大驢俱著卽處斬臬示畢大復禮
並著戮屍臬示餘依議

八月初十日壬戌方受疇奏言據滑縣拏獲何數

卽賀恕桑德卽桑第八二犯臣提犯親鞫緣何

數卽賀恕籍隸滑縣先經教匪邢全忠卽邢四
中誘令入教嘉慶十八年九月初七日教匪滋
事何數撞遇邢全忠裹脅同行派管糧食復令
該犯將村民李大榮拉至賊營邢全忠逼令李
大榮趕車迨官兵攻破白茂村賊營邢全忠等
均被燒斃該犯乘間逃逸後因回家探望被獲
桑德卽桑第八籍隸滑縣被教匪李全信逼脅

代爲做飯官兵攻破滑縣李全信被殲該犯乘
間逸出嗣被盤獲何數卽賀恕請擬斬立決桑
德卽桑第八請發往新疆給官兵爲奴奏入得
旨刑部速議具奏旋經刑部照所擬議覆得

旨何數著卽處斬餘依議

八月十三日丑那彥成奏言據東明縣拏獲從

逆匪犯張爲漢臣親提研鞫緣張爲漢籍隸滑

縣嘉慶十八年九月初八日被教匪李梅裹去
隨同李梅赴濬縣與李文成會齊攻城李梅以
李文成若得地方卽以張爲漢做九門提督之
言相許嗣因未能攻破濬縣李梅又帶同張爲
漢至黃岡營等處搶掠道口破後張爲漢畏懼
逃逸至本年五月間被獲應請擬斬立決梟首
犯事地方示衆奏入得

旨刑部速議具奏旋經刑部照所擬議覆得

旨張爲漢著卽處斬梟示

九月初十日

壬辰

那彥成奏言據杜勝營都司陳

夏熊等拏獲逆匪吳裕呈等四名提省審辦緣

吳裕呈吳城妮劉志高劉春牛均係河南滑縣

人嘉慶十八年九月間吳裕呈被業經殲斃之

教匪李梅率衆裹去隨至滑縣北關拒敵官兵

被烏鎗打傷逃回在家藏躲吳城妮被教匪李
玉林逼脅隨同搶掠遇官兵殺敗乘空潛逃劉
志高與子劉春牛被教匪焦鳳來裹脅在賊營
服役數日卽乘間逃回嗣經先後拏獲吳裕呈
吳城妮均請擬斬立決劉志高劉春牛俱請發
新疆給官兵爲奴奏入得

旨刑部速議具奏旋經刑部照所擬議覆得

旨吳裕呈吳城妮俱著卽處斬餘依議

九月二十三日乙董誥等奏請將聽從助逆情
罪次重之宋二卽宋五擬斬立決於十月二十
日以後行刑情罪又次重之吳六卽吳進才劉
七卽劉啟武俱擬斬監候秋後處決另繕

黃冊進呈於本年朝審以前辦理應行緣坐之劉
閆氏劉大女等五名口均發烏魯木齊給官兵

爲奴姜得富媒娶逆犯劉第五之妻閆氏事後
詢出實情並不首報崔祥知情媒娶逆犯魯光
喜之妻王氏與隱匿逆屬之趙子貴等二名分
別問擬遣徒奏入得

旨宋二卽宋五依擬斬立決著於十月二十日以後
行刑吳六卽吳進才劉七卽劉啟武著入於本年
朝審逆案黃冊一併辦理劉閆氏劉大女著暫緩

發遣交刑部監禁留質餘依議

同日那彥成奏言查開州拏獲逆匪李鐸長垣縣拏獲逆匪童添柱提省審訊祿李鐸本名李庭延係河南滑縣人與子李兼從教匪袁德建入教嘉慶十八年九月內袁德建糾邀李鐸從逆令李鐸在賊營做飯李兼拒敵官兵許給李鐸知府李兼總兵偽號迨袁德建被官兵剿敗

帶領李兼逃進滑城李鐸逃往各處躲避童添
柱係滑縣人被教匪程第七逼脅隨至滑縣河
西拒敵官兵敗回道口童添柱畏懼逃逸先後
被獲李鐸卽李庭延童添柱均請擬斬立決奏
入得

旨李鐸卽李庭延童添柱俱著卽處斬

十月二十二日

癸酉董誥等奏請將聽從助逆情

罪次重之吳大卽吳喜兒擬斬立決情罪又次
重之任自貴擬斬監候秋後處決遵

旨入於明年

朝審情實辦理情罪又次重之葛立業在監病故
應免戮屍素入得

旨吳大卽吳喜兒著卽處斬任自貴依擬應斬著監
候入於明年朝審情實辦理餘依議

十一月初九日丑董誥等奏言臣等節次審訊
逆案內擬斬監候孟大頭等四名已繕具

黃冊進呈茲謹另繕事由清單恭呈

御覽伏候

命下臣等遵將各犯卽行處決奏入得

旨孟大頭入教助逆臨時畏懼未行業已得受刀布
郝八卽郝忠入教助逆臨時畏懼未行業已自行

打刀預備吳六卽吳進才入教助逆雖將白布燒
燬屆期徒手隨行中途逃回均屬法無可貸孟大
頭郝八卽郝忠吳六卽吳進才俱著卽處斬劉七
卽劉啟武入教助逆本應處斬惟僅止代王林看
家並未得受刀布亦未隨同進城事後又在內務
府番役處充當眼目拏獲邪教六名尙有一線可
原著加恩貸其一死永遠監禁遇赦不赦

十二月十四日

甲子

陳預奏言據委弁馬成舉等

率獲教匪宗殿魁王秉元二名

臣

親提嚴審緣

宗殿魁卽宗二庫與王秉元均籍隸曹州宗殿

魁素隨教匪范馬駒習震卦教嘉慶十八年九

月內范馬駒往邀宗殿魁從逆嚇逼同行至魏

家灣等處搶掠宗殿魁旋聞官兵追至卽乘間

逃出王秉元經已正法之教匪袁興邦率衆嚇

通同行代爲運送行李旋卽逃逸回家宗殿魁
卽宋二庫應擬斬立決王秉元應發新疆給官
兵爲奴奏入得

旨刑部速議具奏旋經刑部照所擬議覆得

旨宗殿魁著卽處斬餘依議

二十一年正月二十八日

戊申

陳預奏言據金鄉

縣知縣張京等拏獲逆匪節三

臣

親提嚴審緣

節三籍隸金鄉曾從已正法之教匪張淑習教
嘉慶十八年九月十五日該縣有已正法之教
匪李卓立領衆滋事張淑糾邀節三從逆囑令
推車同往搶掠旋因官兵追捕節三卽逃至南
河一帶討乞度日因日久潛回被獲請擬斬立
決奏入得

旨節三著卽處斬

二月初十日庚申那彥成奏言竊查次要逆犯劉

玉澂與林清牛亮臣等互相勾結實屬著名要

犯在逃日久臣派員四出躡訪茲據河間協右

營守備劉英魁四黨口營守備李士剛稟稱訪

聞山東樂陵直隸寧津交界地方有劉汝榮其

人教演拳棒繪畫老虎售賣年貌與單開劉玉

澂相似臣卽飭該弁等不動聲色先購該處附

近村人杜連城設法往探杜連城邀同朱宗祥等前往投拜劉汝榮爲師學拳聽係饒陽人口

音向劉英魁李士剛告知劉英魁等卽囑杜連

城等誘拏李士剛一面馳至省城面稟臣因聞

該犯拳勇甚精到處多有黨與隨添派都司劉

經千總蘇國太等馳往會同擒拏旋據劉英魁

等稟稱已於樂陵縣屬小米家莊將劉汝榮拏

獲供係饒陽縣人劉玉澄等情臣催提來省復

飛檄饒陽縣知縣陳晉押帶劉玉澄堂弟劉才

等來省認明實係次要逆犯劉玉澄查牛亮臣

原供該犯係離兌吳良四武卦不知何卦頭目

臣與臬司盛泰在軍營審訊教匪僉稱劉玉澄

係教內大頭目今經獲案應請解交刑部詳細

研鞫奏入得

旨劉玉澐著交刑部歸案嚴訊

二月十三日

癸亥

崇祿等奏直隸委員押解逆犯

劉玉澐到案先提另案數犯令該逆雜於其中
再監提董帽太當堂識認董帽太與該逆見面
卽指爲饒陽劉玉澐奏入

上諭內閣曰昨據那彥成奏拏獲大要逆犯劉玉澐
解京審訊茲據刑部審明劉玉澐實係飭緝正犯

那彥成督緝認眞所有伊任內奏事時不將緝捕情形聲敘降三級留任遲孫氏控案並未親提審訊又不附奏緝匪情形併案降三級留任回子伯克過境未派道府大員護送降二級留任三案處分俱著加恩開復其訪明劉玉滢踪跡設法擒拏之河間協右營守備劉英魁著開復遊擊原官四黨口營守備李士剛著以都司陞補均先換頂戴

協同獲犯之寧津縣知縣傅德臨著交部議敘民
人杜連城邀同宋宗祥拜投劉玉滙爲師學習拳
棒誘醉擒獲杜連城著賞給把總並加賞藍翎宋
宗祥著賞給額外外委均令隨標學習以示獎勵

二月十四日

甲子

陳預奏言據樂陵縣知縣唐縉

良稟稱風聞該縣與直隸寧津縣交界之小朱
家莊有來歷不明之劉姓卽會營率領兵役前

往查孥行至中途聞劉姓於是日早間經寧津縣差役獲去隨將窩留劉姓之宋丑宋百順呂廷宋以元等孥獲并起獲劉姓所畫老虎一幅鐵錘一個查劉姓年貌與次要逆犯劉玉澄似屬相符請飛咨直隸嚴究等情臣查劉姓在樂陵縣境內逗留該縣平日毫無聞見據稟情形全係事後彌縫必應革職遣戍使通省知警奏

入

上諭內閣曰前據那彥成奏在樂陵寧津交界地方
拏獲次要逆犯劉玉滙現已解部審訊寔係正犯
本日陳預奏接據樂陵縣稟報訪得該縣境內小
米家莊有來歷不明之劉姓會營率領兵役前往
查拏已被直隸寧津縣差役獲去當將窩留劉姓
之宋丑呂廷等拏獲並起獲畫虎一幅鐵錘一個

等語劉玉澆係久經飭緝要犯在該縣境內一年之久鑿磨畫虎教習拳棒公然與人交接往來並非潛匿地窖山洞可比該縣平日編查保甲訪緝逆蹤所辦何事今該犯已爲鄰境拏獲率將虛詞稟報以冀彌縫實屬可鄙可耻前經屢次降旨令陳預飭屬緝拏要犯並諭以如果獲犯卽係從前久匿境內不但免其失察之咎仍予恩施原指各

州縣自行拏獲者而言若久經窩留境內毫無見聞經鄰境差人捕獲則其咎豈能寬貸樂陵縣知縣唐縉良著革職拏問交陳預審訊擬罪具奏陳預此次京察予以交部議敘原因其在山東巡撫任內二年辦事認真今於所屬境內窩留逆犯漫無覺察卽應交部議處姑念平日辦理本省地方事務尙無貽誤著將京察議敘之處註銷免其交

議

三月初二日壬午陳預奏言查次要逆犯劉玉滢

於上年三四月間到樂陵縣境內盤磨經張丙

義呂廷留住畫虎教拳後來又赴小宋家莊教

拳時來時去至今年二月被獲已革樂陵縣知

縣唐縉良毫無覺察復於事後虛詞稟報冀圖

彌縫應請發往新疆効力贖罪樂陵汎千總臧

繼志請革去千總一併發往新疆効力贖罪前
任勒休樂陵縣知縣劉維旄前署樂陵縣知縣
焦孟竹均請革職其失察之該管知府并該營
遊擊查取職名另行送部議處奏入

上諭內閣曰逆犯劉玉濠在樂陵縣境內畫虎教拳
窩頓一年之久該汎千總職司巡緝並無地方公
事可辦乃毫無覺察其咎較知縣更重樂陵汎千

總臧繼志著革職先於省城枷號一個月滿日責處四十板發往新疆効力贖罪已革知縣唐縉良著卽發往新疆効力贖罪以示懲警前任失察之勒休知縣劉維旒署知縣焦孟竹均著革職該管知府並該遊擊一併查明交部議處

三月二十七日丁那彥成奏言長垣縣知縣王殿傑等拏獲從賊匪犯王二克父親提研鞫

緣王二克又卽王俊隴籍隸長垣嘉慶十八年
十月間滑縣教匪曹二率衆搶掠遇見王二克
又逼令從逆旋將搶得糧食令王二克又隨同
運赴滑城十二月初間官兵攻打滑縣王二克
又乘隙逃出現被訪獲請發往新疆給官兵爲
奴奏入得

旨刑部議奏旋經刑部照所擬議覆

上從之

三月二十八日

戊申

方受疇奏言據濬縣知縣楊

繩武等訪獲從賊匪犯朱成宗元德二名解省

嚴鞠緣朱成籍隸滑縣曾拜教匪王良道爲師

嘉慶十八年九月初七日教匪滋事朱成卽投

王良道入夥王良道領朱成等一百餘人在濬

縣城東山坡遇見官兵逃回又赴朱村勸令村

眾投順該村生員朱繼連與村人王大小朱振
邦等團練鄉勇拒賊抵死不從經宋克俊及王
良道等共領數千人至朱村焚掠朱繼連被殺
王大小受傷未死王良道與朱成等回至滑縣
城內幫同守城迨官兵攻破滑城朱成混入難
民隊內逃出近日潛回被獲宗元德籍隸濬縣
與宗元武宗元臣俱習震卦教嘉慶十八年九

月間宗元臣喚令該犯同入滑城令其帶領數十人往富莊搶劫嗣宗元臣往招宗家灣武生王潔監生宗懷瑾入夥王潔等不從欲將宗元臣等細拏送官宗元臣聞知與宗元德帶領三百餘人前往焚莊將王潔宗懷瑾家屬戕害多人王潔宗懷瑾逃避得脫後宗元武被鄉勇殺死宗元德因率衆焚掠被鄉勇傷斃多人畏懼

逃散二十年冬間潛回被獲臣於審明後卽恭

請

王命將朱成宗元德凌遲處死仍傳首犯事地方示

衆奏入報

聞

方受疇又奏言查滑縣文生朱繼連練勇保守

村莊逆匪王良道等前往勒令投順該生抵死

不從致被戕害可否

勅部酌量議卹出自

天恩其濬縣武生王潔監生宗懷瑾亦經逆匪宗元
德等令其投順不從致被宗元德等率衆放火
該生等逃避得脫家屬被戕並隨同朱繼連練
勇拒賊受傷未死之王大小及朱振邦經臣於
提審時賞給銀牌綢疋合併附陳奏入得

旨該部議奏旋經禮部議將朱繼連照鄉勇例入祀

本籍昭忠祠

上從之

四月初二日

辛亥

陳預奏言前據委員千總馬承

舉等訪獲教匪頭目周文盛一犯臣提犯研審

緣周文盛籍隸定陶曾拜劉允中之徒劉景堂

爲師習震卦教劉允中係徐安幅徒弟周文盛

先於劉允中家與徐安輜認識徐安輜會向周
文盛道及教首李文成偽封劉允中爲知府周
文盛爲知縣嘉慶十八年九月初六日劉允中
與周文盛商謀在定陶縣起事卽於初十日帶
領多人同赴縣署放火戕官復先後在王家店
韓家莊搶掠隨赴河南滑縣徐安輜劉允中等
隨李文成進城留周文盛劉景堂紮住城外劉

允中給周文盛大白旗一桿上寫震官伯大將
軍周文盛九字稱係加封旋經官兵剿捕劉景
堂拏獲正法周文盛逃赴各處躲避經委員馬
承舉等偵獲臣於審明後恭請

王命將該犯凌遲處死訖奏入報

聞

陳預又奏言查周文盛一犯係捐納千總馬成

舉購覓眼線偵知周文盛在河南杞縣地方充當道士卽商同千總崔恒達帶領外委劉彪等

密赴杞縣將周文盛拏獲

臣謹遵

旨查明據實保奏奏入

上諭內閣曰教匪頭目周文盛在逃日久經該弁馬成舉等設法購線於隣境拏獲緝捕尙屬勤能捐納千總馬承舉著賞加守備銜留於山東兗州鎮

標各營內遇有千總缺出卽行補用膠州營千總
崔恒達著卽以守備陞補先換頂戴額外外委劉
彪遇有把總缺出卽行拔補以示鼓勵

五月初十日丑巳方受疇奏言據杞縣知縣甘揚

聲孽獲逆匪李法言一犯臣親提研鞫緣李法

言籍隸山東定陶縣曾拜教匪周文盛爲師習

震卦教周文盛係劉景堂之徒劉景堂係劉允

中之徒嘉慶十八年九月初六日劉允中與周
文盛商謀起事周文盛轉約李法言同行初十
日在劉允中家會集多人同赴定陶縣署放火
戕官並與官兵接仗嗣周文盛等前赴河南滑
縣留李法言在本村照應家口因官兵搜捕李
法言逃往各處躲避在杞縣被獲臣於審明後
恭請

王命將該犯凌遲處死訖奏入報

聞

五月二十九日

戊申

那彥成奏言據新城縣獲解

從逆匪犯于城兒卽于土城及李幅祿卽李二

並逆匪辛五卽辛守幅之母辛王氏一案

臣親

提研訊緣于城兒與李幅祿先後聽從辛守幅

拜李五卽李得爲師入榮華會嘉慶十八年九

月初間辛守幅往邀李幅祿隨同李五進京滋
事李幅祿畏懼未從辛守幅當給白布一塊囑
附滑縣有人殺來帶上白布可免殺害李幅祿
畏害收受辛守幅又將于城兒邀至李五家中
令進京滋事約定十三日夜間在辛家村會齊
起身至十三日李幅祿將于城兒喚往向其勸
阻于城兒躊躇不定當夜未往辛守幅等待至

起更因于城兒不到先卽起身十四日早于城兒至辛守幅家經辛守幅之母王氏告知前情于城兒趕至固安之渾河口未見辛守幅等仍行回家嗣經先後訪獲應請將于城兒擬斬立決李幅祿辛王氏分別發遣爲奴奏入得

旨刑部速議具奏旋經刑部議將于城兒照擬斬決李幅祿收受白布未行改擬斬候辛王氏暫行

監禁俟拏獲辛守幅審明再行核辦得

旨于城兒著卽處斬李幅祿依擬應斬著監候秋後處決入於本年秋審情實辦理餘依議

六月初三日

辛亥

董誥等奏言

臣

等審辦林清逆

案業經先後奏請將首夥逆犯並殲斃病斃自

盡各犯共二百八十五名分別凌遲戮屍斬絞

立決監候其學習邪教應行緣坐及知情故縱

知情不首並牽連逆案各犯共五百七十七名
口亦經分別斬絞立決遣軍爲奴流徒各在案
茲據直隸總督那彥成委員在山東樂陵縣拏
獲次要逆犯劉玉澐並劉玉澐胞兄劉居等解
部審訊緣劉玉澐籍隸直隸饒陽縣素業石匠
手藝併畫老虎嘉慶十一年間劉玉澐曾隨深
州人張老廣學習拳棒又在深州劉洛瑞家見

有張林存放山神冊係學習金鐘罩拳法符咒
卽行攜回十三年十二月間拜素習白陽教之
陳茂林爲師滑縣逆犯牛亮臣在陳茂林所住
莊內教書劉玉澀因與認識十六年間教匪賀
八告以教主劉姓欲定期起事劉玉澀向問劉
姓是何名字賀八以將來總可知道未向言明
十八年四月間賀八帶伊往見林清劉玉澀始

知林清卽係劉姓教主林清以山東河南皆有
夥黨人齊卽可起事之言向告劉玉濬旋卽回
家九月初間賀八邀劉玉濬至林清家與祝現
劉第五同坐飲酒林清告以十五日起事令劉
玉濬進京幫助劉玉濬以路徑不熟未允林清
復令往滑縣投牛亮臣入夥劉玉濬應允並聲
稱伊能畫符念咒行走如飛回家攜取雙刀邀

徒劉文通等前往林清隨令賀八買給新筆黃
紙硃砂並給錢一千而去劉玉滌起身後憶及
與牛亮臣止在陳茂林家會過一面已隔五六
年恐到滑縣牛亮臣不肯收留又聞有官兵赴
河南剿捕不敢前往到家後並未向劉文通等
轉邀嗣聞林清滋事各處拏人出外躲避十九
年春間至山東樂陵縣鑿磨生理四月間至張

五才莊給村人呂廷鑿磨借房居住村人張克成張丙義曾隨學拳數次二十年四月間至館陶縣高家村見祝現劉第五同在茶館劉玉滌詢以何處藏身祝現等告以現在袁武魁家居住彼時因恐被人議破隨各分手劉玉滌仍至樂陵在張五才莊附近之小宋家莊暫住旋回至呂廷家本年正月被直隸委員訪獲劉玉滌應

請擬斬立決應行緣坐之劉居並習教傳拳知情留住之劉文通等十三名分別遣流徒杖擬結奏入得

旨劉玉滌著卽處斬餘依議

臣等謹維麟遊之世亦有封狼鳳噉之朝或生梟鳥妖星偶照不損天漢之光氛祲旋消端賴雷霆之怒况乎潢池盜弄奸宄譁張人

既自絕於天邪亦焉能勝正翦其羽翼何烏
台之不除殲厥渠魁詎蠶蠶之有毒然而樞
機一發詰戎或至經年根株未芟伏莽竟延
累歲從未有懲創之神撲滅之速如平定天
理教匪者也我

皇上經緯萬幾彌綸七德申明軍律嚴飭典刑窮發
難之端先除元惡操輯寧之要首靖

京圻迨夫東豫攻圍專責成而收速效泊乎南山
剿捕防滋蔓而蕝全功凡寅畏之

宸衷周詳之

睿算撫綏之

妙用賞罰之

大權莫不洞燭乎幾先綢繆乎善後臣等近從編輯

竊共校讐敬釋

聖謨用彰

天討夫以逆匪林清之煽惑也叛八卦之教誣三皇
之稱授訣無生蓄謀有日內勾閹寺外結營
員脅從則潛伏郊畿聲援則遙通豫克遂乘
秋獮竊發奸謀當輦輶之戒嚴致閭閻之疑懼而預

迴

帝駕減圍則急雨連朝特示

天威閉蟄而迅雷中夜

明神儼臨夫

禁闕旗折妖燿

皇子親衛夫

宮垣鎗轟賊殪鯨鯢盡戮黎庶鼓舞於迎

鑿貌虎無譁兵衛森嚴於清道

皇上感深

昊服念切

考恩

翠輦裁儀

堯心愈惕

丹毫罪已

禹德彌隆

褒嘉徧逮賢勞譴責不遺泄沓義正尤勤仁育

德音沛而民安有備乃可無虞軍實蒐而兵足凡內
寧之經畫悉

虔鞏所緝熙至若崔士俊伏於山東早膺顯戮李文
成拘于河北祇剩餘生同時之約全虛犄角
之謀何用而蹂躪方甚曹定疊陷嚴城裏脅
愈多輝溶半江蟲賊鹿真走險首逆則據寨
深藏虎盡負嵎羣凶則嬰城固守

皇上淵衷默運

神武聿昭

詔下十行劄操九伐

諭嚴防堵江介無虞

命肅巡邏河堤永固經理用周夫糧餉徵調大集夫

戎兵安陵之勝已聞

特旨尤厯搜捕衛輝之師不進

詔書切責遷延

盼捷情殷

披章丙夜

揆幾智決

籌筆寅朝拉朽摧枯

示兵機以神速披堅執銳鼓士氣而發揚用是道口

殲除桃源翦滅危樓已燬先問司寨之焚崇

皇上隨時布策因地制宜

簡勝兵共乘銳氣勿爲招撫

訓以納叛之非奚事張皇

諭以畫疆之守分股而責無旁貸
芟夷豈慮途歧計
月而功有專歸掃蕩寧虞境險

飭重臣以預堵入川之擾無間

命勁旅以窮追渡漢之謀曷逞勢感乎青號綠號徒

散乎大旗小旗旣萬五陳四之悉誅亦蜀棧
秦關之皆靖矣夫禁鄉勇之募防後患之

特識也罰幼孩之攜肅秋毫之

令典也褒勤事之臣慰忠烈之

殊恩也正失察之罪懲昏庸之

嚴旨也明盡惑之源開悔悟之

仁心也誅傳習之祖絕萌芽之

義斷也且兵革之事旣以威衆刑罰之勅更以戢奸
不用重典無以警邪心不事旁搜無以遏亂

木

皇上恩威並濟

溫肅兼施果是株連皆從末減如經刑逼悉就平反
若惡已極於通天則法難寬於肆市至三至
再緝拏之

旨頻頒用勸用威激勵之

章屢下是以臣民共憤鬼蜮莫逃溯自林雙木之誅
迄於劉玉滢之獲讞獄之事厯乎三年麗法
之囚逾乎八百雖六逆尙遺餘孽而諸臣敢
怠鋤奸如其未伏冥誅知必速羅

天網從此滌瑕蕩穢圉土風清吐氣含和寰瀛歲美
樸淳鼓腹共安田耕井鑿之常邪慝洗心咸

仰

經正民興之治

臣等

霽顏日近

睿旨親承敬維

保泰之由悉本

行乾之化景

奮武揆文之畧莫名贊頌於毫端成纂言紀事之書

竊效掄揚於簡末謹拜手稽首恭跋